

REGIONAL NEWS (MIDDAY)

MISA CONFERENCE

Nimin khan I&PR Conference Hall, Lianchhiari Runah Mizoram Information Service Association (MISA) kumtin inkhawmpui chu I&PR Minister Dr. Vanlalhlana'n a hmanpui.

Dr. Vanlalhlana chuan Mizoram Information Service officer-te chu sawrkar leh mipui inkara palai hna thawktu pawimawh tak an ni tih inhre reng tura chahin, tunlai khawvel thiamna thang zelah anmahni pawh intuaithar reng tur leh inzir thar zel turin a chah a. Khawvel mit hmuha Mizoram leh Mizoram sawrkar hmel phochhuaktu chu MIS officer te an nih thu sawiin, an hnathawh hrang hrangah thil thar leh tangkai ngaihtuah chhuak tura rilru seng zel turin a fuih. I&PR Minister chuan department kaltlanga mipui rawngbawl hna sawt zawka kalpui a nih theih nan a tul angin amah finchhuah zel turin a chah a, a tul a nih phawt chuan amah ngei pawhin bawhzui ngaite a bawhzui hreh dawn loh thu a sawi a ni. MIS officer leh an hnuaiia thawktu indaihlohzia a hriatpui thu Minister chuan sawiin hnathawh na'na mamawh bungraw hrang hrang pawh phuhruk a nih theih na'n theihtawp a chhuahpui tur thu a sawi.

Deputy Director leh MISA president Pu Malsawmsanga tarlan danin MIS junior grade post awm atangin za zela 56 chu hnawhkhah loh a ni a, Aizawl district vil tur Information & Public Relations Officer pakhat chauh a awm thu a sawi. Social media kaltlanga hmalakna kalpui thin dan tarlangin Sawrkar hmalakna hrang hrang mipui hriata phochhuah nan Instagram, X, Facebook leh YouTube-te tangkai taka hman a nih thu a sawi a. MIS Officer-ten hna sawt zawka an thawh theih nan leh an thiamnate an tah hriam zel theih nan 'The Mizoram Information Service Training Regulations 2024' pawh a taka hman tan thuai theih nan duan fel a nih tawh thu a sawi.

I&PR director Pu C.Lalnunkima chuan thawktu indaih lohna karah sawrkar hmalak puanchhuah hna bahlah miah lova thawktuten an kalpui thin chu fakawm a tih thu sawiin MIS Officer-te chu Sawrkar leh mipui thlunzawmtu pawimawh tak an nih thu a sawi a. District office-ah hna tha taka kalpui a nih theih nan lirthei mamawhna a nasat thu a sawi a ni.

<><><>

ENVIRONMENT CAMPAIGN

Nimin chawhnu khan Gauhati High Court, Aizawl Bench Conference Hall-ah Environment ven leh humhalhna Dan, Sik leh sa inthlak chungchang leh nakin hun thlenga nghawng tha lo nei lo tura tihdan phung tha inzirtirna, Mizoram State Legal Services Authority (MSLSA) buatsaih 'Public Education on Environment Protection & Conservation Laws, Climate Change and Sustainable Practices' tih kharna hun hman a ni a. He hun hi Justice Sudhanshu Dhullia, Judge, Supreme Court of India leh Justice Ujjal Bhuyan, Judge, Supreme Court of India-te chuan khualtha niin an hmanpui.

Supreme Court of India Judge pahnih, Justice Sudhanshu Dhullia leh Justice Ujjal Bhuyan te bakah Gauhati High Court Judge, Justice Michael Zothankhuma leh Justice N. Unni Krishnan Nair, MSLSA secretary leh District Legal Services Authority-te bakah sawm bik mi pawimawhte he hunah hian an tel bawk.

Justice Michael Zothankhuma chuan inlawmna thu sawiin, thuchah sawitu Justice Ujjal Bhuyan chuan MSLSA chu kum tam tak chhung executive chairman anga a lo vil tawh thu leh hetiang a urhsun taka leh a bik taka beihpui an thlak chu lawmawm a tih thu a sawi a. Beihpui thlakna hmun apianga mipuite'n phur leh thatho taka an lo tawiam zelnaah lawmthu a sawi. He mi atang hian mipuite ram humhalh kawngah nasa taka an thanharh tawhzia chiang taka a lan thu sawiin, he campaign chhonzawm hian sawrkar thuneitute pawhin hemi kawngah nasa taka hma an lak chhonzawm zel a beisei thu a tarlang baw.

Thusawitu dang Justice Sudhanshu Dhullia chuan rampum huapa beihpui thlak a ni chu lawmawm a tih thu sawiin, hemi kaltlanga thil zirte chu ramchhung mai ni lo khawvel puma kan ngaih pawimawh tur thil a nih avangin tute pawhin sik leh sa, nungcha, ramngaw leh lui dungte humhalh chhonzawm kawngah mawh an phur a ni tiin, mimal, department leh sawrkarte hma la chhonzawm zel turin a chah a. Thalaite leh thangthar zelte pawhin boruak thianghlim leh ram nuam tak an neih hi ram danpui hnuai an chanvo pawimawh tak a ni, a ti a. Thalaite leh naupang zawkte pawhin ram leilung humhim duhna rilru an nei nasa hle tih chiang takin lemziak intihsiakna atanga a lan thu a sawi baw.

<><><>

NO PARKING

Union Home Minister Amit Shah-a'n naktuk (Inrinni) a Mizoram a rawn tlawh dawn avangin hemi ni chawhma dar 10 atanga tlai dar 5 inkar chhungin Thuampui Helipad pengthum atanga 23 Sector Assam Rifles, Khatla inkar - Bawngkawn, Chaltlang, Chanmari, Zarkawt, Dawrpui, Zodin Square, Treasury Square, Raj Bhavan, Tennis Court leh Khatla kawn kawngpui sirah lirthei engchimah dah/hun phal a nih loh thu Aizawl SP chuan a sawi.

Union minister hi Lengpui leh Raj Bhawan inkara lirthei a a kal a tul a nih chuan, Lengpui leh Company peng thum - Hunthar - Vaivakawn - Dinthar - Tuikual - Temple Square - Tennis Court leh Khatla kawn kawngpui sirah lirthei engchimah dah/hun phal a ni lo. Insakna bungrua leh thil dang; kawngpui tihnawk thei reng reng kawngpui kama dah lo turin a inhriattir baw a. Lirthei chhia kawngpui sira dahte pawh lo senghawi vek turin SP chuan ngenna a chhuah baw a ni.

<><><>

BJP GRATITUDE

BJP Mizoram chuan CADCA Village Council inthlan neih zawh taka CADC mipui te'n VC 64 laiah sorkarna BJP an pek avangin lawmthu an sawi.

BJP Mizoram chuan VC inthlan pawimawhzia a hria a, khawtlang hmasawna siamna kawngah hmalatu pawimawh tak a nih avangin, CADC mipui te'n BJP ah rinna an nghtat ngam leh hmasawna tha zawk beiseina an nei hian, mitin hmasawna thlenna atan BJP lo chu a awm lo a ni tih a ti chiang hle ah kan ngai a. CADCA BJP kaihhruai Sorkarah rinna an nghtat ngam chu ropui an tih thu leh, an beisei ang ngei hmasawna, CADC mipuite'n an hmuh theih nan BJP Mizoram Headquarters chuan hma an lak pui dawn niin an sawi.

He inthlanah hian BJP Mizoram chuan hnehna sang tak changin, Village Council 88 awm ah Village Council 64 ah BJP Sorkarna an siam thei a, bial awm zawng zawng 516 atangin bial 364 lai BJP chuan an la thei hi lawmawm lawmawm an tih thu leh CADCA BJP hruaitute inpekna leh an thawhhona tha tak a awm vang a ni tih a chiang a, hma lam hun eng tak

BJP chuan an nei zel hi a lawmawm an tih thu an sawi a. CADC mipui te avanga BJP in hnehna sang tak an nei hi Central lam hruaitute pawh an lawm hle niin an tarlang bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve-ah Chanchinthar hi puan leh a ni ang.

<><><>